

Հաստատված է  
Երևանի պետական համալսարանի  
գիտական խորհրդի  
2016 թ. մայիսի 26-ի թիվ 7 նիստում

ԵՊՀ գիտական խորհրդի նախագահ  
Ա. Հ. Միմոնյան

**ԿԱՆՈՆԱԿԱՐԳ**  
**ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆՈՒՄ**  
**ՊՐՈՖԵՍՈՐԱԴԱՍԱԽՈՍԱԿԱՆ ԿԱԶՄԻ**  
**ՈՐԱԿԱՎՈՐՄԱՆ ԲԱՐՁՐԱՑՄԱՆ ԾՐԱԳՐԻ ԿԱԶՄԱԿԵՐՊՄԱՆ**

**1. Ընդհանուր դրույթներ**

- 1.1. Սույն փաստաթղթով սահմանվում է Երևանի պետական համալսարանում (այսուհետ՝ ԵՊՀ) պրոֆեսորադասախոսական կազմի՝ կրեդիտային համակարգով որակավորման բարձրացման (այսուհետ՝ ՈԲ) ծրագիրը (2016-2021թթ.) կազմակերպելու կարգը:
- 1.2. Կանոնակարգը մշակված է «Կրթության մասին», «Բարձրագույն և հետբուհական մասնագիտական կրթության մասին» ՀՀ օրենքներին, ինչպես նաև «Երևանի պետական համալսարան» հիմնադրամի կանոնադրությանը և ԵՊՀ 2016 -2020 թթ. զարգացման ռազմավարական ծրագրին համապատասխան:
- 1.3. ԵՊՀ-ում պրոֆեսորադասախոսական կազմի ՈԲ ծրագիրը կազմակերպվում է ըստ «Կրեդիտային համակարգով պրոֆեսորադասախոսական կազմի որակավորման բարձրացման կրթագիտական ծրագրի կառուցվածքը և բովանդակությունը (2016-2021թթ.)» մեթոդական փաստաթղթի:
- 1.4. ՈԲ ծրագրի նպատակն է զարգացնել ԵՊՀ դասախոսական կազմի ներուժը՝ ապահովելով նրա ընդհանուր, մանկավարժական-հոգեբանական և մասնագիտական կոմպետենցիաների շարունակական զարգացումը:
- 1.5. Դասախոսների ՈԲ ծրագիրը ֆինանսավորվում է ԵՊՀ կենտրոնացված միջոցների հաշվին<sup>1</sup>:
- 1.6. Կանոնակարգում օգտագործվում են հետևյալ հիմնական հասկացությունները.
  - **դասախոսների ՈԲ հենքային ծրագիր (այսուհետ՝ Հենքային ծրագիր)**՝ «Կրեդիտային համակարգով պրոֆեսորադասախոսական կազմի որակավորման բարձրացման կրթագիտական ծրագիր (2016-2021թթ.)»,
  - **դասախոսի ՈԲ անհատական ծրագիր (այսուհետ՝ Անհատական ծրագիր)**՝ ԵՊՀ դասախոսի՝ Հենքային ծրագրի հիման վրա կրթագիտական բնագավառի նոր պահանջներին և իր նախասիրություններին համապատասխան կազմած ծրագիր:

<sup>1</sup> Այլ բուհերի դասախոսներ ծրագրին մասնակցում են վճարովի հիմունքով:

## 2. Ծրագրի դասախոսական համակազմը

- 2.1. ԵՊՀ դասախոսը ՈԲ է անցնում հնգամյա ժամկետում (2016/2017 ուսումնական տարվա առաջին կիսամյակից սկսած)՝ Անհատական ծրագրով: Վերջինիս հնգամյա բեռնվածությունը կազմում է 30 կրեդիտ. ընդ որում՝ 7-12 կրեդիտը ձևավորվում է պարտադիր, 18-23-ը՝ կամընտրական բաղադրիչներից:
- 2.2. ՈԲ-ն պարտադիր է համարվում վաթսուն տարին չլրացած հիմնական դասախոսների համար մանկավարժական առնվազն երկու տարվա անընդհատ ստաժի դեպքում: ԵՊՀ մյուս դասախոսները ՈԲ ծրագրին կարող են մասնակցել կամընտրաբար՝ գործատուի համաձայնությամբ:
- 2.3. Ներկա ծրագրին մասնակցող ԵՊՀ պրոֆեսորադասախոսական համակազմը բաժանվում է երկու խմբի՝
  - **Առաջին՝ ծրագրին սահմանված հնգամյա շրջափուլով (2016-2021 թթ.) մասնակցողներ:** Սա հիմնական խումբն է, և ներկա ծրագրերը լրամշակված է նրա մասնակիցների համար՝ բնականաբար հաշվի առնելով նաև մյուս խմբի շահերը:
  - **Երկրորդ՝ ծրագրին անհատական հնգամյա շրջափուլով մասնակցողներ:** Այս խմբում ընդգրկվում են նախորդ և ներկա ծրագրերին ուշացումով միացած այն ունկնդիրները, որոնցից յուրաքանչյուրը ՈԲ է անցնում իր ժամկետում: Նրանց համար գործում են առաջին փուլի հիմնական պահանջները կրթական պարտադիր բաղադրիչների մասով:

## 3. ՈԲ ծրագրի կառավարումը

- 3.1. Ծրագրի արդյունավետ կառավարումն իրականացնելու նպատակով ձևավորվում է ՈԲ խորհուրդ՝ ԵՊՀ ուսումնական աշխատանքների և գիտական քաղաքականության ու միջազգային համագործակցության գծով պրոռեկտորների համանախագահությամբ:
  - 3.1.1. Ծրագրի կազմակերպական հարցերով ընդհանուր պատասխանատվությունը և համակարգումը վերապահվում են Հետբուհական լրացուցիչ կրթության վարչությանը (այսուհետ՝ ՀԼԿԿ):
  - 3.1.2. Ծրագրի բովանդակային հարցերով, ըստ կրթամասերի ու բաղադրիչների, ընդհանուր պատասխանատվություն են կրում ԵՊՀ համապատասխան ստորաբաժանումները և նրանց ղեկավարները:
- 3.2. Ծրագրի շահառուները ԵՊՀ պորտալի միջոցով մշտապես իրազեկվում են ՈԲ գործընթացի և նրա արդյունքների մասին:

- 3.2.1. ԵՊՀ պորտալում տեղադրվում են ՈԲ ծրագրին վերաբերող բոլոր հիմնական նյութերը՝ փաստաթղթերը, դասընթացների ցանկերը, ուսումնական ծրագրերը և ժամանակացույցները՝ օգտակար հղումներով: Ունկնդիր դասախոսը, լրացնելով մասնակցության հայտի ձևաթուղթը, ծրագրի կրթական կառուցամասով իր համար կարող է ապահովել տվյալ դասընթացին մասնակցության էլեկտրոնային գրանցում:
- 3.2.2. Ծրագրի հետազոտական-ուսումնամեթոդական կառուցամասով դասախոսի ամենամյա հաշվետվությունը էլեկտրոնային տարբերակով հասանելի կդառնա նաև ՀԼԿՎ-ին, որն ըստ այդ փաստաթղթի կհաշվարկի համապատասխան կրեդիտները:
- 3.3. Ծրագրի գլխավոր շահառուն և կատարման հիմնական պատասխանատուն ունկնդիր դասախոսն է: Յուրաքանչյուր ունկնդիր ըստ Հենքային ծրագրի ինքն է կազմում և վարում իր Անհատական ծրագիրը, ժամանակին ՀԼԿՎ-ին իրազեկում վաստակած կրթական և հետազոտական-ուսումնամեթոդական կրեդիտների մասին՝ ներկայացնելով դրանք հավաստող փաստաթուղթ:
- 3.4. Ամբիոնները և ֆակուլտետները նույնպես վերահսկում են իրենց դասախոսական համակազմի կողմից ՈԲ ծրագրի կատարումը՝ նկատի ունենալով, որ այդ մասին ամենամյա տեղեկատվություն է ներկայացվում ԵՊՀ գիտխորհուրդ: ԵՊՀ ստորաբաժանումները յուրաքանչյուր ուսումնական տարի թարմացնում են առաջարկվող կամընտրական դասընթացների ցանկը՝ ուղղորդելով իրենց դասախոսական համակազմի ՈԲ ծրագրի իրականացումը:

#### **4. ՈԲ ծրագրի կազմակերպումը**

- 4.1. Մույն կանոնակարգի պահանջներին համապատասխան՝ ԵՊՀ ռեկտորի հրամանով հաստատվում են՝
  - 4.1.1. ԵՊՀ պրոֆեսորադասախոսական կազմի ՈԲ հնգամյա հեռանկարային պլանը (2016-2021թթ.),
  - 4.1.2. ԵՊՀ ՈԲ խորհրդի կազմը:
- 4.2. Մանկավարժական առնվազն երկու տարվա անընդհատ ստաժ ունեցող և 60 տարին չլրացած ԵՊՀ հիմնական դասախոսները 2016 թ. սեպտեմբերից դառնում են ՈԲ ծրագրի ներկա շրջափուլի ունկնդիրներ:
- 4.3. Կրթական մոդուլների ուսումնական ծրագրերը մշակում են պատասխանատու ստորաբաժանումները (ֆակուլտետ կամ ամբիոն):
- 4.4. Ուսումնական տարվա յուրաքանչյուր կիսամյակի սկզբում ՀԼԿՎ-ն ԵՊՀ պորտալում տեղադրում է նախատեսվող դասընթացների ցանկը, ծրագրերը և ժամանակացույցը:
  - 4.4.1. Դասախոսն ընտրում է տվյալ կիսամյակում ունկնդրելիք դասընթաց(ներ)ը և ՀԼԿՎ ներկայացնում մասնակցության հայտ:

- 4.4.2. ՀԼԿՎ-ն իրականացնում է ստացված հայտերի կազմակերպական-տեխնիկական ընտրությունը: Հայտարարված դասընթացը կազմակերպվում է, եթե նրան մասնակցելու հայտ են ներկայացրել սահմանված նվազագույն թվակազմով ունկնդիրներ:
- 4.5. Ուսումնական խմբերի ձևավորումը, ունկնդիրների ցուցակը և պարապմունքների սկիզբն ու ավարտը ձևակերպվում են պրոռեկտորի հրամանով:
- 4.6. Դասընթացի յուրացումն ավարտվում է ատեստավորումով (քննությամբ կամ ստուգարքով):
- 4.6.1. Անգլերենի A1 և A2 մակարդակների համար ունկնդիրները հանձնում են ներհամալսարանական քննություն, B1-C2-ի համար՝ միջազգային:
- 4.6.2. Պարապմունքներին մասնակցած, բայց ատեստավորում չանցած ունկնդիրը կարող է կրկնել դասընթացը և նորից հանձնել քննությունը կամ ստուգարքը:
- 4.6.3. «Ընդհանուր պատրաստություն» կրթամասի որևէ բաղադրիչից (բաղադրիչներից) ավարտական պահանջներին բավարարող պատրաստություն ունենալու և այն ընդունված կարգով փաստելու դեպքում (ճանաչվում է ներկայացված փաստաթուղթը, կամ անցնում է ատեստավորում) դասախոսը ստանում է սահմանված կրեդիտները՝ առանց մասնակցելու դասընթացին:
- 4.6.4. Անգլերենից միջազգային այլ քննություն հանձնած դասախոսը կրեդիտավորվում է ըստ անգլերենի միջազգային քննությունների համարժեքության հաստատված սանդղակի:
- 4.6.5. Հիմնական ծրագրից դուրս դասախոսի ՈԲ-ի, վերապատրաստման կամ կատարելագործման (հանրապետությունում կամ արտերկրում) արդյունքները ճանաչվում են՝ հաշվարկվելով Հենքային ծրագրի համապատասխան բաղադրիչի համար սահմանված կրեդիտների շնորհմամբ:
- 4.7. Հետազոտական-ուսումնամեթոդական կառուցամասից ունկնդիրը կրեդիտներ է կուտակում ծրագրի ներկա շրջափուլում կատարած, ինչպես նաև նախորդ շրջափուլում չհաշվարկված աշխատանքների համար:

## **5. ՈԲ ծրագրի արդյունքների ամփոփում**

- 5.1. Դասախոսի Անհատական ծրագիրն ավարտվում է ամփոփիչ ատեստավորմամբ, որի համար հիմնական չափանիշ է Հենքային ծրագրով սահմանված պահանջների կատարումը:
- 5.2. ԵՊՀ պրոֆեսորադասախոսական կազմի ՈԲ ծրագրի ավարտին (2021-ի հուլիսին) ՀԼԿՎ-ն ճշգրտում է ունկնդրի ներկայացրած փաստաթղթերի իսկությունը, հավաստում նրա մասնակցությունը ծրագրին և ընդհանուր հաշվետվություն ներկայացնում ՈԲ խորհուրդ՝ ամփոփիչ (փաստաթղթային) ատեստավորման:

- 5.3. ՈԲ ծրագիրն ավարտած և ամփոփիչ ատեստավորումն անցած ունկնդրին խորհրդի որոշմամբ տրվում է սահմանված նմուշի փաստաթուղթ՝ վկայական:
- 5.3.1. Ամփոփիչ ատեստավորում չանցածները ստանում են տեղեկանք ծրագրին մասնակցելու մասին՝ կատարման ծավալի նշումով:
- 5.3.2. ԵՊՀ պրոֆեսորադասախոսական կազմի ՈԲ ծրագրում ընդգրկված այլ բուհերի ունկնդիր դասախոսներին տրվում է հավաստագիր՝ կրթական կառուցամասով մասնակցության ծավալի նշումով: